



21. februar 2020

Inatsisartut Suleriaasianni § 37 imm. 1 naapertorlugu Naalakkersuisunut apeqqutit imaattut matumuuna saqqummiuppakka.

### **Naalakkersuisunut apeqqutit:**

- 1. Kalaallit Nunaanni nerlerit ikiliartuaarnerat pinaveersaartinniarlugu canadap nerlerinik piniarsinnaatitaanerup sivitsorneqarnissaanut periarfissaq Pinngortitaleriffimmit qanoq nalilerneqarpa?**
- 2. Nunatsinni Canadap nerlerisa ineriartornerat pillugu ilaatigut piniarsinnaatitaanerup sivitsorneqarnissaanut atatillugu naapertuuttumik ilisimasaqarfigaarput?**
- 3. Taamaassimanngippat: kisitsinerit qanoq annertutigisut naammaginarumik ilisimasaqalernissatsinnut pisariaqarpat, ukiut qassit ingerlanneqarnissaa naatsorsorneqarsinnaava, qanorlu akeqassava?**
- 4. Kalaallit nerlerisa piunnarnissaannut Naalakkersuisut allat suut periarfissaatippaat?**
- 5. Islandimi kalaallit nerleri piniagaaginnarniarunik piniarneq taanna piujuartitsinissamik illersuinertut nalilerneqarpa?**
- 6. Soqutigisamut tunngatillugu Naalakkersuisut allanik paasissutissiissutissaqarpat?**

(Inatsisartunut Ilaasortaq Aqqalu C. Jerimiassen, Atassut)

### **Tunngavilersuut:**

Ukiuni kingullerni Canadap nerleri Tunumi annertuumik amerliartorsimapput, matumani amerlassusai piinnarnagit siammasissuseq aamma eqqarsaatigalugu.

Paarlattuanik kalaallit nerlerat ikiliartupiloorpoq ”2018-imi Kalaallit Nunaanni tulleriissakkat malillugit aappaluttuni” ilaasutut nalilerneqarsimalluni, taamaasilluni ”aarlerinartorsioqqajaasutut” taaneqarsinnaalluni. Nerleq Kalaallit Nunaanni eqqissisimasussaatitaavoq, eqqissisimasussaatitaagaluarlunili 1997-imiilli piunera kinguariartupiloorsimalluni. Inuit pilersitaannik ajoqusersuinerit saniatigut kinguariarnerup Canadap nerlerinit unammillerteqarneranit pilersinneqartoq ersersinneqarpoq.

Canadap nerlerisa amerlatsikkiartorneranni kalaallit nerlerisa piffimminnit qimaatikkiartuaarnerat ilimagneqarpoq, taakkuullutillu manniliorfissaqqinnerugaluartut aammalu nerisassarsiorfiginnerugaluartut.



Canadap nerleri 1. aggustusiminngaanniit 15. oktober i tikillugu piniqqusaapput. Maajimi Kalaallit Nunaannukartarput manniliortorlutik, naliginnaasumillu septemberimi qimaguteqqittarlutik.

Isumaliutigineqarsinnaasut ilagaat, Canadap nerlerisa piniarneqarnerat annertusineqarsinnaalluni (assersuutigalugu piniagaanerisa sivitsorneqarnerasigut) kalaallit nerlerisa atugaat pitsangorsarneqarsinnaammat, taamaasilluni ikiliartupiloornerat unikaallatsinneqarsinnaalluni – imaluunniit piniagaanerisa sivitsorneqarnerasigut kalaallit nerlerinut aarlerinaateqartussaasussatut nalilerneqassanersoq, matumani piffiit tamarmik najortagaanni piniarnerit akornutaatinneqarlutik.

Kalaallit Nerleri piffissami manniliorfimminni malussarissutut oqaatiginiarneqartarput, tassani qaammatini maajimi, juunimi aammalu juulimi pislarluni, taamaakkaluartorli aamma isanerup nalaani juulimi aggustusimilu.

Ullut suliffiusut qulit qaangiutsinnagit akineqarnissaq kissaatigaara.